

道光遵義府志

遵義府志卷五

水道考

言水者據目見爲準善矣然於古爲何水及說者何得何失略不考證將稽古何賴焉此鄴亭注所以不可及也遵義水道前輩晏氏洪氏皆有考說敘今旣略證前復疎今就見在條次郡中大水而以境內諸小水從之各註舊說稍參所見會入者非經本郡概從其略健步難周問津無所有可臨陳來者詳焉

烏江水

烏江源出威寧州東北山東流數十里一水自南來

會東南流經黑章汎北稍東有一河合三水自南來
會折北曲而東八十里有則底河出雲南鎮雄州西
境山南流八十餘里入貴州界合東自七星關北來
之後所河自北來會又東南伏大山下二十里於南
麓流出經七星關南又東南流百三十里至畢節縣
南之大山而伏二十餘里於東麓復出曰天生橋東
稍北流有落腳河北自大定府西北合畢節諸水來
會又東經大定府南境八十里有烏西河出府東北
山北來俗曰六歸河又東稍北五十里有西溪河自
北合二水來注之又東至黔西州南境有牁龍河高

家河自西南來各注之又東南有楊柳河西南自平
遠州合諸水來注之又東南有以麥河自西南來注
之又東有三岔河西南自安順府西合以且海諸水
來會又北折而東經鴟池汎北有池水自南來注之
又東稍南有跳蹬河南自鎮西衛來注之又東北經
修文縣西北境有雞公河南合廣順州及安平清鎮
二縣水來注之又東北經六廣汎西北又東北經修
文縣西境曰六廣河又東北有息蒙所水自東南來
注之又東北經遵義縣之烏江關北鎮南關南自此
俗曰烏江江北岸皆遵義西南境又東至石牛口渭

河合樂岡河自西來注之又東南經烏江關自此江北岸皆遵義南境有三岔河來注之

三岔河一出遵義縣南五十里羅衙龍潭南流十五里至千工堰一從縣南四十里煤塔橋滙諸澗水東流十餘里來會一從縣南五十里沙子坎龍井出滙諸小水北流十餘里來會又東十里過水口寺又五里爲底水河又十五里過馬家橋一水出縣南五十里馬蹄井流十五里過寶峯山又二十里爲芎江水又二十里來會之三岔河又南十五里至大魚塘又十里至小魚塘又十五里爲大

麻水又十五里爲小麻水又二十里至烏江關東
南入烏江

又東有清水江南自貴筑合龍里貴定諸水北流來
會又東南經開州之西北境至茶山關渡自此江北
岸皆遵義東南境有五龍溪蘆江水來入之

五龍溪出遵義縣南八十里郭家壩又十五里爲
五龍溪又二十里爲苦水又二十里爲上溪又十
里至茶山南入烏江

蘆江水出遵義縣南六十里柏楊壩井水南流十
里過馬作房又十五里爲干溪又十里過河村又

十里爲福祿水又十五里過吳家橋又十里過茅臺又十五里過葑家林又二十里爲蘆江水又二十里至茶山南入烏江

又東南經甕安縣北境至羊崖關又東南至合口洪江合湘江及樂安江自西北來甕安河自南來注之自此烏江流出遵義府東南境全入平越州正北境又東南至餘慶縣西北境折東北流有餘慶司水自北來注之又東北百里有牛腸河合小江自南來注之又東北北受落花屯水又東北經石阡府西境龍泉縣南境有崖頭河自南來注之又東北至石阡府

北境思南府西南境有白崖河南自石阡府城來注之又東北有清江溪合諸水西自龍泉縣來注之折北經城東又北有猛溪河自東南來麻海溪自西南來各注之又北稍東經印江縣西北境有清水江東南自縣城來注之又北稍東百餘里至婺川縣東北境之沿河司東折西北流入四川西陽州之西南界自此東岸四川界西岸貴州界有三岔河東北來注之又北稍西百餘里有南溪河東北自湖北施南府合諸水西南流至龔灘來會自龔灘之西而北有洪渡河自西南婺川縣合諸水來注之自此全入四川

界又北稍西百二十里至彭水縣南境有長溪自西南來注之又西北經縣西又北有中清河東北自湖北利川縣西南流合諸水經城北而西注之又北有合溪口水自西南來注之又西北有木宗河北自射香溪合二水來注之又折西南流至江口鎮北曰黔江河三江南自綏陽縣正安州合諸水北流來注之又西流經武隆廢縣南折西北流有一水自東北來注之經白馬鎮北有石梁河合三水西南自方竹箐都家壩北流東合後溪河來注之又北流稍西有大溪河西南自南川縣合諸水來注之又北有百灘

溪自東來注之又北折西而北流受西南來一水又北曲曲至涪州城東北銅柱灘入大江亦曰涪陵江也

水經注延江水篇經延江水出犍爲南廣縣又東至犍牯營縣東屈北流至巴郡涪陵縣注更始水注更始水卽延江枝分之始也延水北入涪陵水涪陵水出縣東故邑郡之南鄙張堪爲縣會公孫述擊堪同心義士選習水耆筏渡堪於小別江卽此水也其水北至枳縣入江更始水東入巴東之南浦縣又謂之西鄉水亦謂之西鄉谿谿水間關

二百許里方得出山又通波注遠復二百餘里東南入遷陵縣經又東南至武陵酉陽縣入於酉水注酉水北岸有黠陽縣許慎曰温水南入黠蓋鑿水以下津流沿注之通稱也故縣受名焉西鄉谿口在遷陵縣故城上五十里左合酉水酉水又東際其故城北又東逕酉陽故縣南而東出也兩縣相去可四百許里於酉陽合也經酉水東南至沅陵縣入於沅又江水篇經江水東至枳縣西延江從牂牁郡北流西屈注之注華陽記曰枳縣在江州巴郡東四百里治涪陵水會庾仲雍所謂有別

江出武陵者也水乃延江之枝津分水北注逕涪陵入江故亦曰涪陵水也其水南逕武陵郡昔司馬錯泝舟此水取楚黔中地又沅水篇注西水導源益州巴郡臨江縣故武陵之充縣西源山東南流逕無陽故縣南東逕遷陵故縣界與西鄉溪合卽延江之枝津更始之下流謂之西鄉溪口華陽國志巴志巴郡枳縣郡東四百里治涪陵水會涪陵郡涪水本與楚商於之地接秦將司馬錯由之取楚商於地爲黔中郡南中志朱提郡漢陽縣有漢水延江

元和郡縣志黔州下西有延江水一名涪陵江自牂柯北厯播費思黔等州北注岷江婺川下内江水一名涪陵水

元豐九域志黔州彭水縣有巴江

太平寰宇記内江一名涪陵江一名巴江

輿地紀勝涪江自思州之上費溪發源流經五十
八節名灘方至黔州灘與施州江合流又九十里
經彭水縣凡五百餘里與蜀江會水常湛然徹底
以其會於黔州呼爲黔江

段玉裁說文注温字下水經江水過枳縣西延江

從牂柯郡北流西屈注之枳縣今重慶府涪州治
枳與涪陵縣接壤今涪州城東北有黔江南自貴
州合諸水入焉亦曰烏江亦曰涪江亦曰涪陵江
此水自西而東而北源流二千三百里會貴州大
定貴陽遵義平越石阡思南六府及湖廣施南半
府四川西陽黔江彭水南川涪州諸水實巨川也
一統志原按水經注延江枝分爲更始水東入巴
東之南浦縣謂之西鄉水間關二百里許方出山
又二百餘里東南至西陽入酉水今施州江自湖
北流入合黔江東流至辰州合酉水者爲酉陽境

內之疊溪然非黔江枝流豈古今水道不同或傳聞有訛歟舊志謂黔江自黔州分流入黔江縣界亦名施州江又東北入湖廣施州衛界以來入之水爲分出之水亦誤

蜀水經注黔江亦名延江亦名更始水亦名涪陵水卽烏江水經謂延江合酉水入沅今酉陽州酉水出州北龍池鋪犀牛潭伏流二十里南至泉孔而出環繞州城南至何家壩洞口又伏流五十里至州東蒲海場過梅樹龍潭入辰州與延江大山間隔本無貫注之理殆由山川通塞古今異宜亦

猶夷水出江沔水入渭不得以今疑古也

按烏江卽古之延江元和志確然可據其源委
水道提綱言最詳核今次烏江水道惟郡境流
注諸水就目見序之其上下流皆因齊氏原文
至水經以枝津入酉合沅古籍必別有所見而
現在水道可知今據烏江下流漢武陵郡中之
水如提綱所序三岔河南溪河中清河且滙郡
西境之水來入烏江中間烏江別無支流入酉
甚明今考湖南辰州之北河卽酉水其西南一
源出四川酉陽州西南與貴州烏江界之平茶

司兩溪合流爲嘉塘河烏江自婺川沿河司以下流經酉陽西南境卽去酉水發源不遠桑酈時地處荒僻傳聞大概易致混淆枝分入酉之說蓋由此然據江水篇注謂延江枝津逕涪陵入江故亦曰涪陵水似所謂枝津乃指涪陵以上自武陵來會延江之一派與延江沅水兩篇注謂從延江流出者不合則酈氏於桑經似亦未盡以爲然特注家於本經不敢顯與舛背抑或本經原有脫誤注時因牽就爲說待後之讀者自見乎

方輿紀要烏江或謂之邠水或謂之湖江

按唐地理志有邠州所隸樂安宜林芙蓉瑯川等縣地州廢後皆歸播州知邠州蓋從邠水立名貢山縣後改爲湖江縣則亦以湖江名也湖與烏疊韵邠重讀卽是烏攷元史文宗紀始見烏江之名而李德輝傳言他日常夢主烏江在至元十七年可知稱烏江在元以前矣

今水經烏江志名牂柯江以江出於牂柯郡也其源有二東源出自程番府界東北流過龍里衛西翁首河東入之至貴州城南南明河西入之東北

流過巴鄉西歷平越衛西境四十里過新添司經
貴州城東境一百五十里爲清水江過谷龍爲紫
江由涓潭入于西源之烏江西源出自安順州西
堡司西北五十里東北流經司治前爲谷隴河貫
州城過金筑西境至威清衛城西爲滴澄河遶衛
城北經青山司北至陸廣驛西爲陸廣河過清河
驛及黃沙渡巡司南距貴州北境二百里爲烏江
南岸有烏江關乃貴播之界河也遶播州司南至
東境七十里湘江入之經容山司東與東源之江
水會烏江又東北經石阡府西境一百五十里龍

底江來入之烏江又東北入思南府境西南十里
鮎魚峽東流過府治南爲水德江又東流過印江
縣思印江北流入之又東北經沿河司河由江入
之又東北至彭水縣爲黔江歷新灘關灘至涪陵
入於川江

按烏江之源自以水經出犍爲南廣爲確不得
以烏江清水江並稱兩源且黃氏舍威寧正流
而以安順之的澄河當西源尤與古籍今流不
合蜀水經謂南廣郡縣在貴州大定府境內今
考鎮雄威寧永寧皆南廣縣地如提綱序烏江

源出鎮雄威寧界中與桑經導源古今合轍安順漢夜郎縣地絕非南廣自黃氏不暇詳究而烏江上源愈生轆轤矣

明史地理志遵義縣下東有烏江源自貴州水西卽涪陵江上源黔江縣下南有黔江源出貴州思州府界正流自涪江合大江支流經此下流爲湖廣施州衛之清江安化縣下南有水德江卽烏江之分流

按明史志序烏江原委參錯猝難貫絡其云支流爲湖廣清江水德江亦其分流更與水經更

始水不同具列以備考

晏斯盛黔中水道考烏江卽夜郎水出修文縣西北之陸廣河其上自威寧州之八仙海營菩薩汎露州各溪澗流出過畢節縣西南七星山下爲七星水有關曰七星關溯威寧道滇南者多濟此元馮福可詩曰點蒼何蒼蒼環以西洱河百年雨露恩詎敢煩天戈轅門振烏撒衣帶踰牂柯巨險久已平故關尙陂陀云胡七星名亦復重不磨此以知其徼塞矣今有橋曰七星橋明嘉靖間道人黃一中建橋西南有黑章水注之或曰卽墨特川元

大德五年劉國傑破蛇節宋隆濟於墨特川倘此地耶又東流至大定府西南有落折河自府城西北二十里當兩山間破地吼出南流來注之又東過府治南東流右得以則河又東左得烏西河又東爲六歸河又東右有簸朶河合武着墮極織金等河水自平遠州界黑跨牛場汎東流來注之又東北有西溪河合楠木溪水東南流來注之又東至黔西州東南爲鴨池河有渡曰鴨池渡兩岸如劈崇崖如雪黔西大定要津又東至修文縣西北是爲陸廣河距修文五十里舊爲水西驛道有渡

曰陸廣渡明王文成公曉發詩有曰白鳥去邊迴
驛路青崖缺處見人家謂斯處也有水自安平縣
東南界東北流爲落陽河又東北至清鎮縣城西
爲滴澄河又北與安順府東南之九溪河北界之
三岔河谷龍河下流合而東北流來注之又有三
潮水自修文縣北流來注之又東左合白花箐水
又東左合沙溪水有渡曰黃沙渡又東有羅傅大
河自永寧縣東南過遵義府西南流來注之又東
過修文縣養龍司北是爲烏江唐李學士白流夜
郎有烏江畱別宗十六環詩所謂白帝曉猿斷黃

牛過客遲遙瞻明月峽西去亦相思者蓋其地云
今有渡曰烏江渡關曰烏江關黔蜀要津又東得
刀靶水又東得養馬水又東至開州東北遵義府
綏陽縣西南有渡曰茶山渡有水自桐梓縣西南
正安州西至石子坡南過遵義府西南入湘水右
合綏陽縣北之源溪水朗水傘水厚水南流來注
之又有三江水自湄潭縣北合窄溪渡上關花水
溪湄溪大洞溪馬渡溪角路溪大溪諸水從廢容
山司至望浦台流北來注之又南有渡曰落汪渡
右合渡口水又南有洗泥河水注之東南至崖門

有南明河水來注之南明河出貴陽府廣順州東
北阿沙壩龍潭合濟番河會一宿河尤愛溪上馬
橋河四方河過中曹司至府城西南左受黔靈山
諸泉水及擇溪貫城河水東過府城南右得富水
又東南得龍洞河黃泥哨牛渡河諸水東由廂子
口喇平司迤北至巴香合平伐三岔河八字河所
匯貴定縣城西之甕城河再過平越府西境之清
水河一曰皮隴江者東北經開州東南由天星橋
八弔口棉花渡而東北會於崖門崖門在開州東
甕安餘慶二縣西北有渡口崖門渡爲黔楚蜀通

津波流湍激合沓溯彭固眾壑之關竅亦一川之樞要矣又東至龍泉縣西南有渡曰葛閃渡又東南有甕水鬲坪水袁家渡水白崖河水滙爲江界河合餘慶縣之白泥司水佛山河水北流來注之又東至桶口有水自餘慶縣東南界北流爲滿溪合石阡府之龍底河凱科江洋溪深溪樂回溪等水東北流注之又東爲三江口思石平遵通津也江楚商旅由銅江陸行者多自此濟蜀賈鹽艘溯思南而上者亦多泊此其西有得勝關又東北流有水自龍泉縣東南流來注之又東流過思南府

城南是爲德江有渡曰德江渡又東有白鷺洲浮沙清淺宕漾江心遊觀者泥焉又東得鸚鵡溪其西有石門唐史載牂柯境內有石門山此其是耶又有思邛水從印江縣西北之朗溪流來注之又東過婺川縣東左有豐樂河得煎茶溪水登龍河水合洪渡河倒羊溪水東流注之又東過婺川縣東北界而達涪州爲涪水通於蜀入於江唐史稱城樂縣西一百五十里有涪陵水方輿勝覽稱思州有巴江水者是也

按此考在水道提綱之前最稱詳核故並載之

惟卽以爲太白與宗十六畱別之烏江是其大
誤按唐淮南道有烏江縣隸和州歷陽郡潯陽
記載九江之名一曰烏白江三曰烏江張須元
緣江圖載九江之名四曰烏士江六曰白烏江
太平寰宇記引潯陽記云九江在潯陽去州五
里名曰烏江是大禹所疏太白所謂烏江者指
潯陽江耳非和州之烏江縣更不得以遵義之
水附會也

渭河水

渭河源自豳西州西南二百四十里狗頭坡龍洞流

出東流十五里經青桐坡又南二十里經獐子壩又二十里經朝陽寺又東二十里經迴龍寺又二十里至袁家橋又二十里至竈泥堰合崖孔水水源出黔西州西南八十里崖孔龍塘西流二十里過開花寺又南流十里來會渭河又東流十里至遵義縣西境鼓樓大橋合打鼓寨水水源自黔西州西南六十里打鼓寨龍塘流出南流三十里來會自是北岸爲遵義西境南岸爲黔西東境又南流十里爲官塘又東流十五里經白鶴林又十里爲割麻水又十五里爲中渡又二十里爲偏崖塘黑水西南來入之

黑水源自遵義縣西一百里楓香壩之響水洞流出南流十五里爲溫水其水上下十餘里冬夏常溫又十五里經太平場又十里爲落石塘三現身水來入之水源不知遠近至遵義西一百里之三現身時見時隱地因以名自此伏流山穴約五六十里至風崖出南流十里爲波羅海又十里入落石塘合而東流二十里爲黑水又十里入渭河

又東二十里至袁公塘白蠟坎水來入之

白蠟坎水源自遵義縣西八十里大木堰龍塘流出西南流十里過構壩馬鬚嶺水來入之水出嶺

之龍洞東流二十里來合白蠟水白蠟水又東流
十里經花苗田又十里過土壩又十里過白蠟坎
又十里爲甕塔澤又南流十里過大廟場又西南
十里入渭河

又東流二十里至底水臨湖陽水來入之

湖陽水源自遵義縣西七十里龍洞流出其洞一
日之中或增或減不可測度水西流十里爲下水
伏流石穴約十餘里至水洋溝出南流十里過六
衙莊又五里爲湖陽水又十里爲洋汪水又十里
至水流崖懸流三四十丈聲聞十餘里又南流五

里過水煙又十里過牛角洞洞兩崖如峽水從中
流三里許出鴨溪來入之溪自縣西六十里白果
灣龍塘流出南流五里過鴨溪場又十里過張氏
壩又五里入湖陽水湖陽又西流十五里入渭河
又東流十里爲鹿角塘又二十里得大渡口乾溪來
入之

乾溪自遵義縣西南七十里黃土壩井源流出南
流十里過土壩窠又十里過龍鑽頭又十里爲乾
溪又十里過桐枝關又西十五里入渭河
又東南十里至江北觜樂間水來入之

樂閩水一自遵義縣西六十里竹流水龍洞流出
西南流十里過藍公埧南流二里爲平橋河左
龍潭二相去僅數步名雙龍塘水來入之又南
里至余村一自縣西六十里黃魚孔龍洞流出
流十里過綠竹埧又五里至余村合流又西十里
過落潮又東南五里過佛海寺又五里爲泮水又
五里爲甕海河右岸十餘丈有龍淵水冬溫夏涼
流出入之又東五里過楠木觀又十五里過樂閩
城又南十里爲吐流水又十里爲金鼓塘有猫猫
河來入之猫猫河一出縣西三十里八里水塘之

馬跑井一出八里水塘之東石崖下合流五里許
爲東塘又東十里過太夫塢伏流山穴約二十里
出南流二里爲猫猫河右有一小溪來入之又南
五里入樂聞水樂聞水又東南十里爲馬渡河又
十里爲水白渡又十里爲砵石渡又西南十里兩
岸懸壁夾流入渭河

又東南三十里爲石牙渡又東三十里爲石牛口又
十里東入烏江

前漢地理志犍爲郡漢陽下山關谷漢水所出東
至營入延

水經延江水篇注延江水又與漢水合水出犍爲
漢陽道山關谷東至犍邑入延江水

華陽國志南中志朱提郡漢陽縣有漢水延江

按漢之漢陽世多以爲今四川敘州長寧縣地
今考延江在赤水之東長寧在赤水之西漢水
若在長寧及鄰境內焉得越赤水而入延如班
志所云者或又謂水道提綱序烏江上源之以
且海乃水經所稱延江出南廣者其謂鎮雄發
源之水卽班志之漢水此亦與班志不合蓋犍
縣西南爲平夷地平夷西南爲南廣地如以延

江出鎮雄者當漢水則漢陽地乃在鎮雄威寧之間漢水入延不仍在漢陽卽當在南廣於盤尙隔一平夷班氏不應云至盤入延也然則今黔西大定交永寧一帶皆漢陽舊境自黔西大定流入烏江之水惟渭河最大又於遵義界入烏江則今渭河卽漢水明白矣又班氏志水之例源委短者不註里長者必註之所言漢水無里數則必流短若源在威寧鎮雄永寧中間是至盤必經犍爲牂柯兩郡流數百里班氏必云過郡二行若干里皆無此文蓋知此巨津流短

之渭河必是漢水卽水證地卽地證水兩
合至延江不經漢陽地華陽國志當是有
入延江今本多奪文不得以之疑漢陽因
水也

洪江水

洪江一源自遵義縣北九十里婁山關山麓龍芒
源自縣北八十里陳家埧龍塘一源自縣北九十
悠遠屯龍井一源自縣北八十里楊庫村龍洞並
流約二十里許合爲板橋河西流十五里過五把
又二十里過羅五埧又十里至四面山場有大橋

來入之

大橋河自綏陽縣龍井出南流五里至口又十里過冷竹坝又十里過楠木坝又二十里過籬笆箐又二十里爲大橋河又十里至一灘又十里東南入洪江

又西南二十里過四面山又十五里爲洪江又三里過水圍山又五里過清乘橋又十五里爲金鼓又十里爲猪槽塘湘江自西來會之洪湘合流又爲官倉河又十里至兩河口龍坪水爲人之

龍坪水源自遵義縣南四十里白泥堰井水出

流二十里過天生橋又十里爲南面水又十里至
龍坪一水自縣東南一百里綢子山龍井出東北
流十里過官田坝十里至馬渡頭十里過馬寨十
里爲洗牛水又十里來合之又東北流十里至水
尾入山穴約七八里至老鷹崖出又東北十里爲
魚劍水又十里過嚴家灣又十里過高公橋又十
里爲八木塘又十里過水口寺又十里至兩河口
入洪江

又東南十里爲泥塘河有車水來入之

車水源自遵義縣東七十里上龍塘塘伏流二里

許至下龍塘出南流十里過大石橋又南十里爲車水又十餘里西南入洪江

又南十里爲戲子灘高溪水來入之

高溪水源自遵義縣南八十里龍崖兩洞水合東北流五里爲高溪水有團溪來會之又十里爲清江塘又二十里爲前幹水又十餘里入洪江

又南二十里過渡上關又西南流曲曲六十里至黃灘合口入烏江

湘江水

湘江上流二支右支名桃溪源自遵義縣西北八十

里山中流出經夏家溝東北流十五里過松林場又
十里至上莊塢一水自板水溝出東流十里來會又
十里至下莊塢一水自毛獺溝出東流十里來會又
東十里爲牛蹄塘一水自縣北五十里九龍山麓龍
洞出西南流十餘里來會又東十里爲羅家河又南
十里過四涯塢一水自縣北六十里魚孔龍洞出東
流十里至崖底又十五里過江村受左岸龍洞之水
東流十五里來會又南流十五里過迎水寺又西南
二十里過巷口場又十里過紅崖一水自縣西五十
里之一里塢場龍井出西南流十里過經藏寺又東

十里過後田又東南十里爲小溪又十五里來會又西南十五里爲官渡頭又東南十五里爲老龍塘又十里過桃溪寺又五里爲二道河一水自縣南二十里龍坑場之大龍塘出東北流十里過忠莊鋪又五里來入之又東南五里過下場水橋又五里至合曰左支名穆家川源自遵義縣西北四十里金鼎山左麓大板水溝龍井流出東北十五里過海龍坝一水自縣北四十里海龍囤山麓流出爲那巴水西南流二十里來合爲龍馬溪又東北流十五里過大覺寺又五里至得鹿橋會川河自縣北四十里李村坎龍

并流出東北十里過高坪又十里過樣子橋又五里過董公寺又八里爲九岳灘又五里至得鹿橋來會之又西南五里至普濟橋有竹鑑溪自縣西大銀坎東流過半山涯來入又南三里過郡治北關沿城經東關福壽橋又南二里過獅子橋經湘山鶴池水出山麓流入之又西南流經縣學宮東南流五里至合口雨水會流是爲湘江又東南五里爲楊渡頭又十五里爲小塘河又東十五里爲兩渡水又二十里至猪槽塘東會於洪江

前漢地里志犍爲郡符下溫水南至營入黠黠水

亦南至鼈入江

說文溫字下水出犍爲符

各本符作涪按犍爲南無涪縣外段氏正

入黔水

永經延江水補注鼈縣有鼈水東與溫水合溫水

一曰煖水出犍爲符縣而南入黠水黠水亦出符

縣南與溫水會駙駙謂之闕水俱南入鼈水鼈水

于其縣而東注延江水

依戴氏校本

段氏說文注

黠黔音同黔水卽黠水漢志符下

今本疑有脫字以水經注正之疑當云溫水至鼈

入黠水黠水亦出符至鼈北入江鼈非入江之地

今云至鼈入江非例也但許不言黔水所入班但言黔水入江不言何處入江古人略之蓋其慎也按今湘江水卽溫水洪江水卽黔水湘江當以桃溪爲正源其發處卽漢符縣東南境爲班許所指之溫水無疑此水南流入洪江洪江亦南流入烏江則班氏所言黔水亦必指今之洪江水今漢書黔水至鼈入江元本必是至鼈入延何以明之觀水經注敘溫黔二水俱南入鼈水鼈水於鼈縣東注延江其說必是本漢書元文若漢書本是入江酈氏當於江水篇中敘說無

緣牽攬爲延江注也此可定今漢書入江爲入
延之誤無疑惟水經注稱黠水亦出符縣班氏
於黠水所出無明文此酈氏以班志敘黠水在
符縣下意亦必出符卽添出之不足爲據至又
以意攬入盩水爲溫黠俱會盩水東注延江不
思漢書敘盩水明云過郡二行七百三十里何
得云盩縣有盩水盩水卽於其縣注延江此實
舛謬之至段氏俱未細審反據酈注改訂班書
以求合志水之例皆入江一字之誤貽之也

元和郡縣志播州帶水縣東至州七十里因縣北

有帶水爲名

按今洪江水卽唐之帶水唐播州治在今綏陽縣治帶水縣東至州七十里可知縣在今綏陽之西當今長左右長灘江河卽洪江唐置縣因之立名知爲帶水無疑矣

方輿紀要帶水源出舊縣西大山東流經帶水縣城北又東流至廢胡刀縣界注湖江水湖江卽烏江也

按紀要此文引舊志當是宋元間圖經故源委方向與今洪江水道並合非臆揣之說也以此

推之又可知黃灘上渡等處皆唐胡刀縣地
又按明地理志遵義東南有仁江東有洪江俱
流合於烏江明一統志洪江在遵義東四十里
源出大樓山合仁江入烏江仁江在遵義東南
五十里源出永安驛山澗下流合湘江入烏江
貴州通志據之謂烏江與湘洪仁三江合似洪
江仁江是兩水今驗合湘江入烏江之水遵義
止一洪江仁江當是異名實非二流也

樂安江水

樂安江源自綏陽縣西北朗里之八甲溝大溪源出

旁有小溪源來合之西南流十里爲螺江一水自朗里之桅杆坪流十里來入又東二十里至黃魚橋雅水來合之

雅水源自綏陽縣金里流出爲楊柳水東流十里爲達摩溪又十里至綏陽縣治東門外轉經南門至西門外爲干工堰一水自金里蕭家洞出流十里一水自金里崖孔出流五里俱來入之是爲雅水西流十里至黃魚橋會樂安江

又西南流二十里爲窩沱河一水自金里清水坪流二十里來入之又十里爲緞水入遵義縣界又西南

十里至合口有焦溪來入之

焦溪自遵義縣東八十里魯家埧出爲焦溪溝流
十里過五鳳莊又五里過荷包場又五里至合口
入樂安江

又東南經汪家山十餘里爲綠塘河有土溪北來入
之又西有打蛇埧伏水東有潘家泉伏水入之又五
里爲崖銀塘東有仙人洞伏水入之

土溪源自綏陽縣東北諸山小水匯流行數十里
過鄭家場又十里爲土溪又五里爲八木塘又十
五里至河曰北入樂安江

打蛇埧水流二三里卽入石穴約六七里至漆樹塘出流五六丈又伏約二里許至周家泉出入樂安江

潘家泉伏水不知源處至潘家灣時伏時見約七八里至潘家泉出入樂安江

仙人洞伏水不知源處至仙人洞見其勢甚大旋入石穴約五里許至一坪見旋伏約三里許至暗洞明流里許又伏流三里許出入樂安江

又西南五里至水牛山抱山東折又南五里過禹門寺又五里至水白渡有黃池水北來入之

黃池水源自遵義縣東八十里永靈廟井水山南
流五里爲黃池左受石板堰龍洞水右受後坝水
又南十里至傅家橋一水出橋北半坎溝龍塘南
流來會又南十里入樂安江

又西南十里至下沙灘有羅公水東北來入之

羅公水源自遵義縣東一百里李家坝西流十里
爲銅線溪流至打桶埡伏山出爲通渡溝又五里
至大坝一水出遵義縣東一百里欄牛坎山頂洞
中南流十餘里來入一水出綏陽縣東三十里背
娃山洞中爲冷水溪南流十里過蕭家坝又十里

來入又南五里爲台頭河一水出遵義縣東八十里水源溝一水出縣東九十里大眼關龍塘俱來會又十五里爲羅公渡又五里西南入樂安江又十里爲雙車陂有野貓水出遵義縣東八十里青山響水洞西流二十里來入之又南十里過三台山有龍溪北自羊舞場經楊柳田來入之又東南二十里許爲格邦渡又二十里至雲門壘穿壘出與湄潭河會

湄潭河有二源一自綏陽大山之陽南流五里許經山陽口折西入湄潭界小板角關一自綏陽許

家山之陰北流五里許至石家溝折東五里入湄潭界大板角關兩關相距三里許兩水合而東流十里至馬鞍山北折五里過龍水口經米山東折三十里過土關南折二十里過麻沙灘經渡上埧東折十里至長潭南折二十里經馬渡北折五里至扎龍潭有蒲水河合天神塘水錫樂坪水來會折西五里名小魚潭折南十里名大魚潭至墩上有九洞橋水自鵝公舖北來入之折西二十里至湄潭縣後王屏山折西南五里經縣城有湄橋水自餘慶黃泥井經偏橋衛客樓屯北經象山西來

入之又西南二十里有荆橋水東自角路溪經崖
箐西南流來入之是名合同水又西南十里有馬
渡溪自開元舖北來至虛閣廟入之又西十五里
至木窰子有煎茶溪自遵義弔子口東經三渡關
南至塘頭入之又西南十里至雲門壘南會樂安
江二水合流

又南十五里過渡上關有合沮水西北來入之又十
里過乾溪又西南五十里至合口入烏江

元和郡縣志播州遵義縣本恭水縣夷牢水經縣
北一里

按今樂安江水卽唐之恭水夷牢水貞觀中置
恭水縣又徙智州治義泉更曰牢州州縣蓋以
此水得名義泉縣地當在今綏陽境中樂安本
唐初舊縣屬邠州後州廢貞觀五年以樂安屬
智州十一年智州徙義泉改牢州唐本新書今遵義
縣樂安里當是唐樂安縣地其地與綏陽接壤
故牢州廢後卽省樂安入芙蓉縣隸播州今水
與里尙存樂安之名猶可得唐初州縣彷彿
方輿紀要志云夷牢水西自帶水縣來東流經城
北一里又屈曲南流入廢胡刀縣界

按所引當是宋元間舊圖經故能源委確鑿此
又可知今綏陽金朗二里傍西北一帶爲帶水
縣舊境所云經城北仍是本元和志非謂帶水
城也

又按元方輿勝覽夷牢山在敘州宣化縣南夷
人祭社於此飲酒歡樂夷語以樂爲牢故名二
蘇有過宜賓見夷牢亂山詩據此則此夷牢水
之名其義蓋同

三江水

三江源出綏陽縣西北趙里之分水嶺有二支嶺右

支自杉木箐發源西北流三十里合馮村溝水爲黃魚江下納四小溪一小箐水流二十里大礮溝流十五里峰坎溝流十里蟒水流五里俱來入東流二十里爲渡頭河有三潮水焦溪溝各流十許里來入又東北流十五里爲石梁河有桑木關水流三十里蝦扒口水流十里劉家溝兩丫河桶腳河各流數十里來入又東北流十五里爲磨坦河有九溪水同入赤尾溪來入之九溪並發源金鐘山山連亘正綏界內周三百餘里九溪蛇溪李干溪燕崖溪南宮溪梳子溪赤尾溪猛溪黑溪也又東北十五里至深溝子又

十里爲官渡河流至紅花灘入正安州境又東北十餘里至三角塘合東南來嶺左支嶺左支自唐村溝流出受馬蹄溪桐油溪龍井崖洗腳溪諸水東北流經黃村埧爲牛渡河又東北至芭蕉塘受趙里白峭山諸水凡流一百七十里經月亮崖至三角塘合嶺右支又有林溪河來入之

林溪河發源正安州石城南山寨山中東流數十里經牛渡埧爲林溪河東北至三角塘合流

二支合流東北四十里至米糧渡又二十里至獨龍塘又四十里至羊渡清溪河來入之

清溪河源出正安州西一百餘里槁塢合出自南川縣牛角寨之水東流四十里至四板渡又十餘里有一水來合又東爲廟堂河又西三十餘里爲雙橋河又西北二十里爲思溪又西南三十里一水源出綏陽縣西北木耳灣山中東流至正安州西老林角合出自綏陽陶家坪之水又流入綏陽經南風北掃爲對插埡河來合之轉東流又合源自綏陽東北黃桑埡經野茶埡流來一水爲三道河北三十里爲渡牛河又三十里爲猿渡河又四十里爲清溪河又五里至羊渡東出合流

又東二十里至小魚塘又二十里至大魚塘石梁河
來入之

石梁河源出正安州西南八十里五溪合流二十
餘里入州西三江里爲五河水又十餘里至稗子
塘伏山出又六十餘里至州城西爲水車河又三
十里爲馬渡河又二十里至兩會廟有石峽口水
來入之又二十里爲橋溪河又數里經州城東十
里爲石梁河有護城河源出州西南象鼻山六水
合流經城西轉北門外東來入之又有許溪源出
州西苦竹窩五水合流至州城西而東而北復東

來入之又東三十里至大魚塘合流

又東二十里至螺螄塘三江河來入之是名三江

三江河一源出四川南川縣柏枝坝九派合流至合溪場入正安州北境東南流三十里至新洲場又五里過務本堂又七十里至蓮子坝又三十里至三江口一源自正安州西八十里三派合流爲鄭河溪東流三十里至官莊坝又三十里爲羊心灘又四十里爲源塘河折南二十里爲虎跳河又折東十餘里至柏子坝又十餘里至三江口一源自正安州東北九龍山眾溪合東南流爲安思溪

又十餘里爲碗廠溝又十餘里至三江口三水合
流爲三江河東南流四十里至螺螄塘會三江
又東北三十里爲石板渡又三十里經正安州舊城
西門外濬水園折北二十里爲麟渡又三十里爲趙
北渡折東二十里至角木塘又二十里爲石岡內河
又東二十里至三合口土城河來入之

土城河一源自四川南川縣金佛山之水東南流
六十里經立石板爲銅槽溪流入正安州東北小
溪里爲火墨溪至兩岔乘鳳河源自南川縣大指
拇山流入正安思寧里經小溪里至兩岔來會東

南流爲梅江河至三岔口一源自四川涪州流入
正安東北小溪里爲沙河西南流數十里至三岔
口水三水合流數十里爲土城河至三岔口入三江
又東十里羊肝溪來入之

羊肝溪源出正安州小溪里東南流經丁家壩又
合一小水來入三江

又東十里至濫坝子場入四川彭水縣界折西北百
餘里至江口鎮入烏江

前漢地理志牂柯郡鬱縣下不狼山鬱水所出東
入沅過郡二行七百三十里

水經延江水篇注潒縣有潒水出邑西不狼山東
與溫水合溫水出犍爲符縣南入黠水黠水亦出
符縣南與溫水會俱南入潒水潒水於其縣而東
注於延江水

按今本漢志皆是潒水入沅據今遵義諸水並
東限延江無得入沅之理以水經注推之其牽
混溫黠入潒水正誤已如前說然據其稱潒水
入延水必是本漢志元文惟漢志言溫黠潒三
水皆是入延故酈氏易致不察串爲一水可見
今本漢志東入沅乃入延之誤而潒水爲今之

三江明白矣不狼山未確詳所在今驗婁山朗
山蜿蜒東行亘綏桐正安界中三江諸源皆出
於山之北麓婁朗聲並近狼此或是歟洪亮吉
貴州水道考謂不狼山卽龍巖山湘江水卽鼈
水此則未經實勘誤據明統志稱湘江源流五
百餘里謂於漢志行七百餘里差合不知今湘
江上下流不及三百里兼是南流入烏江已與
漢志鼈水方向道里不合且湘江源委皆在遵
義界更與鼈水過牂柯武陵二郡大相懸殊洪
氏誤也

〔元和郡縣志黔州洋水縣下〕以縣西三十里洋水
爲名

〔太平寰宇記〕洋水北流入信寧縣界

〔四川通志〕山川門彭水縣下洋水在縣西南亦名
南洋水按上流卽芙蓉江自正安州會諸水流入
東北經縣西界至江口鎮入黔江距縣八十里舊
志謂西南三里誤

按三江卽芙蓉江其下流爲洋水川志此按甚
確

〔明史地理志〕真安州下南有芙蓉江自烏江分流

東北入於黔江又有三江東南流合於虎溪亦注於黔江綏陽縣下東有水德江亦曰涪江亦曰小烏江流入彭水縣界仁懷縣下東南有芙蓉江下流注於烏江彭水縣下東南有水德江源自貴州思南流入涪陵江安化縣下東南有水德江卽烏江之分流有思印江流合下流入涪陵江婺川縣下東有河只水羅多水下流俱注水德江

按芙蓉江水德江涪江小烏江皆今三江隨地之異名明志所稱皆是此水確實可據惟謂卽烏江分流與今水道不合又其敘芙蓉江三江

似是兩水猝難別白至黃氏今水經謂烏江過思南府治南爲水德江方輿家多沿其說則非也

水道提綱渡頭河出綏陽縣西北境婁山關之東北東流合西北來一水東經桑木關北合南來一水又東北流有關渡河自西來會又東北曰米糧渡西受一小水又東北有牛渡河自東南來會又北流有清溪河自西南來會又東北經正安州城東南又東北有橋溪河自西來注之又東北有二水合流自東南來注之又東北有三江河自西來

會三江河者一曰安泗溪自西南來一曰羊心溪自西來一曰河九溪合黃泥河又有白魚河合一水俱自西北來合而東南故曰三江河也又東北經舊正安州西又北而東百餘里有大花溪自西南來注之折西北流百餘里至江口鎮之西入烏江此水源流六百里

長溪水

長溪水自正安州東南思寧里發源東北流經婺川縣北界入四川彭水縣之南境東北流西南入涪陵江

元和郡縣志都濡縣以縣西北六十里有都濡水
爲名

太平寰宇記都江水在洋水縣南七十里

按都濡洋水兩縣地皆在今彭水縣境內元和
郡縣志之都濡水太平寰宇記之都江水皆是
今正安流出之長溪四川通志按輿圖長溪卽
都濡水不誤也

又按貴州通志芙蓉江在正安州城南一百里
源出婺川縣經州境入岷江卽謂此水以源處
在正安婺川錯壤故言出婺川下流則不可據

小溪水

小溪水發源仁懷縣之五花山東南流經丁山之麓曲折流形如之字故又名之溪至合江縣東南入於大江

名勝志合江縣西有之溪三繞筆架九繞丁山過月臺迤邐而去

松坎河

松坎河源出桐梓縣北四十里銅鼓園北流二十里合源山縣北五十里鹿角山水又北五里至兩叉水合羅溪溝水又北十里至三坡合茶店小水又十里

至新站合後水又五里至三叉河合石場塢水又五里至蒙渡合夜郎塢水又五十里過三元塢打寶舖至松坎爲松坎河又北二十里至兩河口木瓜廟河從正安州流出西北來入之又東北至界牌入四川綦江縣界又西北至太公舖二郎峽溪出桐梓縣北二百餘里苗龍山之麓流數十里東北來入之又十里至趕水鎮有藻渡河自東南來溫水河自西南來俱入之

藻渡河源出桐梓縣北水塢塘西南流四十里爲楊墩河又西南至南天門有一水自東來入之爲

坡頭河又西受九嶺十三彎之水爲藻渡河又流
至趕水入松坎河

溫水河源出仁懷縣北溫水場流經綦江界數十
里又受來自仁懷北界經綦江梨灣頃安盛場一
水合流至趕水東南入松坎河

又北至東溪鎮一水出仁懷縣東北條台岡自西來
入之又北至篆塘有魚梁河源自仁懷東北界經郭
扶橋合石龍場之水東流注之又北至三溪有蒲渡
河自東北來會

蒲渡河源出南川縣永派溪經東鄉頃入綦江界

西流爲麻埧河受金蘭埧仙女洞諸水又西爲蒲
渡河永城河自南川縣西南流來會又經蟠龍溪
石角鎮至三溪會松坎河

又北經綦江縣城東鹽井江自分水嶺流來合三角
塘水西注之又折西至北渡鋪入江津縣界爲清溪
口清溪河自仁懷界內流出西南來注之

清溪河二源東曰三岔溝西曰魚子溪自仁懷縣
東北界將軍嶺流出北至三角塘合來自江津界
一水又東北受二水合爲清溪河約行二百餘里
至清溪口入松坎河四川通志謂輿地紀勝所稱

奉恩溪卽此水

又西北受自紫金場西來一水又北有孫溪河自江
津界北流來入之又北至江津縣東南江口北入大
江

〔元和郡縣志〕三溪縣以縣內有𤇗溪東溪葛溪三
溪合流爲名

〔元豐九域志〕隆化有𤇗溪

〔太平寰宇記〕𤇗溪自三溪縣西北流經丹溪廢縣
又北流經南川縣東南四十步又北至江津縣南
十四里西北流入大江

輿地紀勝夔溪亦名夜郎溪從夜郎境流過南平
軍城下又東溪在軍之西北

元統志南江在南川縣眾溪會合至三溪口可通
舟楫行三十里至綦市又至南江口入江

一名勝志南江入綦江縣界其色蒼白名曰綦江又
夔溪在江津縣東南三十里來自夜郎境闊三十
步深七尺可通二十石舟

今水經南江在南川縣眾水會合至三溪方通舟
楫行三十里至綦市至南江口合於大江
重慶府志綦江有三溪一自桐梓縣坡頭河流四

十里至綦江縣捍水鎮一自桐梓縣松坎流五十里一自仁懷縣李漢墳流六十里亦皆至捍水鎮三派合流名三岔河又順流一百六十里入縣界爲綦江又順流四十里至縣城東又西北三十里至白渡口入江津縣界又一百二十里至南江口入大江

水道提綱綦江源出桐梓縣北境山兩源合北流百數十里曰松坎河受西南來一小水又北數十里坡頭河自東北山來注之又北流西受一水又北九十里有三溪河自東來會又北七十里經

綦江縣城東而北有龍角溪自東合三小水來會又折西流經城北又西北流有沙溪溝自東北來有清溪河自西南合三岔溝及魚子溪水東北流三百餘里來會又西北百里北受一水又北有孫溪河西南流合棋盤山水來會又北至江津縣東又北入江曰夔溪口

綦江縣志按府志所云只是趕水之三岔去三溪鎮遠甚據形勢應指自坡頭河來者爲東溪自松坎來者爲夔溪自蒲渡河來者爲葛溪方於三溪爲合

赤水

赤水出雲南鎮雄州西北山東流折而東北經州北境曰綿陽河有阿朗河及北來一水自西北來會折東南流經四川永寧縣南境百五十里入畢節縣界名赤水有小河西南自畢節縣北境合孫家河板橋河諸水東北流來會又東北流六七十里至馬蹄灘六十里至魚塘一水自畢節經龍場營又一水由獐子關經清水塘合西南來注之又西北折而東至蠟坡渡一水由黔西平定里入仁懷之九倉塢流五十里來注之又東至鄢家渡入仁懷縣界黎民鎮北有

沙填河南合三水北流來會又東北至新灘有澧水南注之

澧水一名鹽井河源出仁懷縣西十里楠木垵龍井西流繞縣治過十五里過鴨石箐又十里至號兒口又二十里至柳村口又二十里爲楠木塘又二十里爲螞蟥溝又十里過新橋又十里至兩叉河一水源出仁懷縣南三十里績麻山半龍井西流十里爲魚孔又十里爲水碓河又五里伏流山穴約三十里至斑鳩崖出又十里會鹽井河又三十五里過糯米洞又十里至龍塘入赤水

又經縣西二十里至三鎮卽茅台村正北流六十里至二合樹有金溪河來注之

金溪河源出仁懷縣西磨塘龍井西流十里至大塘箐十里爲冷溪溝受龍潭水又十里爲扒竹溝又十五里爲金溪河又西南十里爲白魚塘又十里至麻塘口又十里至二合樹入赤水

又西五里至羅村有五岔河來注之

五岔河出仁懷縣西小浸溝龍井西流十餘里過趙桶坝會出羊坝龍塘流二十餘里一水又十五里至潘家洞會出打柱崖龍井流二十餘里一水

又西十五里爲五岔河又十五里過大沙埧又十里過官莊埧又十里爲羅村河入赤水

又西六十里至青龍灘溱溪水自西北來會又西有沙埧河來注之

沙埧河源出仁懷縣西北風崖龍井南流爲井埧河至穿孔伏流約二十里出又西十里過三石扇灣至乾溪一水源自遵仁界上南流來會流十里過魚孔又十里過永安寺又十里至吳馬口又十里爲趙渡河又十里過天生橋又十里復伏山穴約二十里出爲沙埧河又十五里入赤水

又西入仁懷廳界經土城至猿猴灘又經老仁懷鎮過廳城至三江觜合鰾水

鰾水

鰾水一源出綦江界內一源出仁懷縣北四百里之九倒拐至黃金塘合流西南經安家垠牛欄溝水來注之

牛欄溝水源自仁懷江津界上西流約六十里注鰾水

又至三岔有小赤水自西南大水河自東北流來注之

小赤水源出仁懷縣合江縣境上西南流約百里入鰲水

大水河源出仁懷縣北界之陳村東北流約六十里入鰲水

又至獅子口有柏栗塙水來注之

柏栗塙水源自仁懷合江界上西流約五十里入鰲水

又至木貓溪有吼灘河來注之至大黑水有岔口河來注之

吼灘河源出吼灘西南流六十里入鰲水

谷口埧河源自仁懷縣廳界上受包貢溪水東
流約六十里入鰲水

又西南經長灘箐過石堡寺至魚灣有天鵝池水來
注之

天鵝池水源自仁懷縣廳界上北流經大小栗溪
過牕子埧約八十里入鰲水

又折西至官渡塘經纏溪石笋至高洞名鰲水又西
經長沙箐有小溪來注之

小溪出仁懷縣廳界上北流經紅崖埧楊司崖約
七十里入鰲水

又西水梨溪來注之

水梨溪出仁懷縣合江縣界上大槽嶺南流經龍洞獨木橋約五十里入鰲水中有瀑布高四五十丈爲仁北大觀

又西至石鹿溪入合江縣境有石鹿溪來注之

石鹿溪源出仁懷縣廳界上北流約五十里入鰲水

又西四十里至三江嘴與赤水合又三里經馬街子
遶合江縣南關轉東入大江

前漢地理志犍爲郡南廣下汾關山符黑水所出

北至熨道入江又有大涉水北至符入江過郡三行八百四十里

水經江水篇又東過符縣北邪東南鰲部水從符關東北注之注符縣治安樂水會水源南通寧州平夷郡暨縣北逕安樂縣之東又逕符縣北入江其鰲部之水所未聞矣或是水之殊目非所究也又江水篇東南過熨道縣北條注江水又與符黑水合水出寧州南廣郡南廣縣導源汾關山北流有大涉水注之水出南廣縣北流注符黑水又北逕熨道入江謂之南廣口

天平寰宇記安樂溪水從牂柯生獠界來八十里合汶江

四川舊通志安樂溪在合江縣西南自仁懷縣流入卽古大涉水

四川通志山川門合江縣下安樂溪在縣東一名小江卽古大涉水亦曰鰓部水自仁懷縣流入下流五十里至縣城東北隅合大江又永寧縣下赤水在縣東一百八十里源出貴州鎮雄州界水腦洞流經赤水衛又東北合永寧河明初郭英等出永寧敗賊於赤水河卽此

吳培赤水考赤水一名齋郎水見通志圖內源出貴州仁懷界蒿枝里楚米坡經小溪里一一之溪入瀘州合江境會蜀江古有苗齋郎曾居此因名舊志赤水河在敘永東二百里源出貴州赤水衛下通符陽大江水經江水過符縣鰾部水注之鄺注符縣治安樂水會水源出盤縣經符縣北大江其鰾部水或是水之殊目寰宇記安樂溪從牂柯生獠界來合汶江舊通志安樂溪即古大涉水水經注大涉水注符黑水經犍道入江謂之南廣口通志南廣水在今慶符縣北一百三十里源出烏

蒙山箐經筠連高縣流入又北流十五里經縣西
門外又東北流一百三十里經宜賓縣南廣洞入
江按符縣今之合江漢爲符縣蕭齊時爲安樂縣
南廣今之慶符筠連高珙等縣犍道今之宜賓屏
山等縣合通志水經注則大涉水乃南廣水非安
樂溪舊通志誤也合水經注寰宇記則鰾部水乃
今之安樂溪考其源流俱與赤水合或因地理名
在合江爲安樂溪在敘永爲赤水則今之赤水卽
古之鰾部水可知顧自道元時已謂非所能究况
厯千數百年又何從臆度哉姑備錄之以質之博

古君子

按符黑水大涉水在漢志判然二流入江則一在棘道一在符顯爲別白自酈氏注水經始牽混大涉水入符黑水後之考赤水者於此處不敢與酈氏相違而不知其實與漢志戾也今考漢南廣境內之水符黑水流至慶符縣入江其流甚短故班志不著里數惟赤水出鎮雄經永寧畢節仁懷至合江入江首尾將千里在漢爲出犍爲經牂柯復入犍爲漢志言大涉過郡三行八百餘里舍此水別無足當者則大涉水爲

今之赤水無疑其鰾部水安樂水卽今之高洞河今此河自高洞以下土人皆名鰾水此水產鰾魚爲他水所無故於古地名鰾部其水卽名鰾部水大涉水鰾部水合流數里卽入江其上流皆是巨津無可軒輊水經以高洞河爲主故在符注江者只稱鰾部水不及大涉漢書則以赤水爲主故只言大涉水至符入江又不及鰾部後世言水道者無一知有高洞河今以俗稱證之古名欽固水道確然易見矣至吳培稱齋郎水爲赤水上源其說大誤齋郎水卽溱溪乃

流注赤水者非源也其符黑水易與大涉水混
琪縣舊志載符黑水辨源委甚核並附於後以
備參稽符黑水辨符黑水在縣南一百四十里
渡上水車堤內數洞中涌出按其地勢源似出
於鎮雄東一支自鎮雄威信靖遠司山中發源
西流合黃水由兩河口入琪縣至張漢堤沿岸
皆石洞伏流至水車堤出口而北流七八里至
羅星渡會汾關山之經流遂成巨川北流至
羅又北至平寨台德邁河西至高縣更名復
寧河北會宋江經慶符至南廣口入江灘石險
峻不通舟楫明代征九絲蠻始開鑿運糧南廣
口石上大書轉明代征武是也今滇銅蜀鹽亦由
此運考漢志南廣符黑水北至樊道入江若水淹
注云江水自武陽東南逕樊道縣北若水淹水
合從西來注之又東與符黑水合入江處謂之
南廣口所謂若水淹水合從西來注者即金沙
江謂之正黑水禹貢華陽黑水推梁州是也其

從南廣入江者謂之符黑水唐時改爲阜水阜亦黑也漢志稱南廣縣汾關山符黑水所出今詢汾關山在川滇接壤之永寧而此地舊屬於漢之南廣縣無可疑也

永道提綱赤水河西南自鎮雄土府東北合諸水經合江城東而北注江此水曲折行受數小水幾及千里

溱溪水

溱溪源出桐梓縣北六十里長槽坡象鼻子南流由板廠溝合官堰打鞦埧袁家溝諸小水至石橋合小水溝經羊哀洞石溪溝沿流合龍洞河鴉雀灣馬村風崖上埧莊子頭魚子孔諸水流五十里至官塘經

桐梓縣治東南又十里至縣城南門外有黑石溪來入之

黑石溪源出桐梓縣西三十里戴河溝流入三門洞至水驢壩出東南流爲青龍溪又南流至城南入漆溪

又南五里爲官渡河有洋江河來入之

洋江河源出桐梓縣東四十里龍塘壩經石板塘龍會場天橋冷水坪西南流入漆溪

又西十里至賀家灣有南溪水來入之

南溪源出桐梓縣南二十五里婁山半箐經南溪

化園馬鞍山東北流二十里入漆溪

又宗家塢方家洞十里許入葫蘆洞出經馬江
塢爲水坎河經國公橋至濁水三潭有狼渡河源出
桐梓縣西南楠木廠流經釣魚臺來入之又西南六
十里至鴉塘有虎跳河來入之又西南至大塘口有
馬路河來入之

馬路河一名又水源出遵義縣西八十里黑腳崖
龍洞東流十里爲帶潮水又十里至兩河口一水
自頭道河龍洞出南流十里過焚井塢又流十里
來會合流十里爲大龍塘又十里過包紙坎又十

里過袁家樓又十里爲三合塘又二十里過楊院
村又十五里過觀音寺又五里爲石窖塘又十里
過廟頂又十里過落爐又十里西北入漆溪
又西南五里過龍崖寺又五里過趙桶村又十里爲
牛渡灘又十里至轅門觀過天聖寺入仁懷縣界東
南十里過火燄龍又十五里過下馬殿又十五里爲
五老灘又二十里爲阜角灘又十五里爲米糧渡又
十五里過鐵索橋又十五里至兩河口入赤水

元和郡縣志漆州以南有漆溪水爲名

貴州通志漆溪在桐梓城東一里齋郎水在城西

六十里古有苗名齋郎者居此故名流出縣東楚米坡至米糧渡會赤水河入大江

永道提綱齋郎河東自桐梓縣東北山水合龍崖山水西流經縣城南西流百七十里又北合一水西南流會赤水河